

四庫全書

經部

欽定四庫全書

經部

四書通證

大學章句或問
論語集註卷上

詳校官給事中_臣丁雲錦

刑部郎中_臣許兆椿覆勘

總校官進士_臣繆琪

校對官學正_臣常循

謄錄監生_臣王元愷

欽定四庫全書

經部八

四書通證總目

四書類

大學章句或問通證一卷

論語集注通證二卷

孟子集注通證二卷

中庸章句或問通證一卷

臣等謹案四書通證六卷元張存中撰存中

字德庸新安人初胡炳文作四書通釋義理

而畧名物存中因排纂舊說成此書以附其
後故名曰四書通證炳文為之序稱北方杜
維山有語孟旁通平水薛壽之有四書引證
皆失之太繁且各有未完存中能刪冗從簡
去非取是又曰學者於余之通知四書用意
之深于通證知四書用事之審推之可謂至
矣今核其書凡引經數典字字必著所出而
夏曰瑚商曰璉承包氏之悞者乃置此一條

不引禮記以證之蓋不免有所回護不知朱子之學在明聖道之正傳區區訓詁之間不足為之累亦不必為之諱也又如三讓引吳越春秋泛及雜說而歷代史事乃置正史而引通鑑亦非根本之學然大概徵引詳明于人人習讀不察者一一具標出處可省檢閱之煩于學者亦不為無補也乾隆四十三年五月恭校上

總纂官

臣紀昀

臣陸錫熊

臣孫士毅

總校官

臣

陸費墀

四書通證原序

北方杜維山有語孟旁通平水薛壽之有四書引證皆
失之太繁且其中各有未完處觀者病焉今友人張德
庸精加讐校刪冗而從簡去非而從是又能完其所未
完者合而名之曰四書通證以附余通之後學者於余
之通知四書用意之深於通證知四書用事之審德庸
此書誠有補云泰定戊辰正月壬辰雲峰老人胡炳文
序

欽定四庫全書

四書通證凡例

一四書集注明理用事簡明為尚至集成而理愈晦矣雲峰胡先生去其晦而取其明則理通矣今箋義出而事益繁矣存中不揆僭越去其繁而從其簡則事亦通矣此二書之所以作也

一旁通杜氏以朱張語孟為之今只證朱子所引事者其餘皆不復出

一引證薛氏所集與旁通同時如語孟所引者則一而薛氏訓詁太繁又引四書互證四書似此類皆不復出

一標題四書熊氏以旁通增益而已凡旁通未有者今皆參考增附於此

一四書箋義趙氏所輯與旁通標題相類而過於繁冗如集注本自明白者不必引可也今亦參考增附

一凡四書通內已注釋者此不復出如大學序王宮
有學及禮樂射御書數之類取熊氏標題及齊氏
六藝說已明白矣其餘詳其所難知畧其所易見
如旁通引證有遺缺者輒紀一二然所引經子史
集則一故不標係某人所紀慮其繁也

一存中指摘先輩深懼不韙然不從簡俾初學之士
夸多務靡玩物喪志至不為心身之求則無益矣
校之旁通諸書此三之一爾然猶自以為繁惟同

志之士是正幸甚

凡例

四書通證

羣書總目

周易

尚書

毛詩

周禮

儀禮

春秋

大戴禮

禮記

爾雅

左氏傳

公羊傳

穀梁傳

尚書大傳

韓詩外傳

左傳註疏

家語

老子

列子

莊子

楚辭

荀子

賈誼論策

淮南子

抱朴子

揚子

史記

春秋國語

吳越春秋

戰國策

兩漢書

魏志

蜀志

南史

唐書

帝王通歷

資治通鑑

世說

劉向說苑

新序

博雅

黃帝素問

杜少陵詩集

韓昌黎文集

周濂溪文集

邵康節文集

溫公潛虛易

近思錄

正蒙書

道學語錄

宋齊丘化書

陰陽金匱書

四書標題

語孟旁通

四書引證

四書箋義

欽定四庫全書

大學章句或問通證

元 張存中 撰

章句序

司徒之職典樂之官所由設也

書舜典帝曰契百姓不親五品不遜汝作司徒敬敷
五教在寬夔命汝典樂教胄子直而溫寬而栗剛而
無虐簡而無傲詩言志歌永言聲依永律和聲八音
克諧無相奪倫神人以和夔曰於予擊石拊石百獸

率舞

周禮地官司徒惟王建國辨方正位體國經野設官分職以為民極乃立地官司徒使帥其屬而掌邦教以佐王安擾邦國

記誦詞章之習

禮學記記問之學不足以為人師

記問謂豫誦禋難禋說至講時為學

者論之此或時師不心解或學者所未能問按近思錄謝顯道云嘗錄古人善行別作一冊明道先生曰是玩物喪志胡安國云謝先生初以記問為學自負該博對明道舉史書成篇不遺一字明道曰賢却記

得許多可謂玩物喪志謝聞此語汗流浹背及看明
道讀史又却逐行看過謝甚不服後來省悟却將此
事作話頭接
引博學之士

虛無寂滅之教

通鑑漢驃騎將軍霍去病出隴西過焉音煙耆山得休

屠王祭天金人顏師古曰今佛像是其遺法也初帝
聞西域有神其名曰佛因遣蔡愔等之天竺求其道
得書及沙門以來其書大抵以虛無為宗貴慈悲不
殺以為人死不滅復受形生時所行善惡皆有報應

故所貴修鍊精神以至為佛

傳十章

楚書楚語

國語楚語王孫圉聘於晉

圉楚大夫也

定公饗之趙簡子

鳴玉以相

趙鞅鳴其佩玉以相禮

問於王孫圉曰楚之白珩猶

在乎

珩珮玉之橫者

對曰然簡子曰其為寶也幾何矣曰未

嘗為寶楚之為寶者曰觀射父

言以賢為寶

能作訓辭以

行事於諸侯使無以寡君為口實又有左史倚相能

道訓典以叙百物以朝夕獻善敗于寡君使寡君無

忘先王之業又能上下說于鬼神順道其欲惡

說媚也

使神無有怨痛于楚國

痛疾也

又有數曰雲夢連徒洲

金木竹箭之所生也

楚有雲夢藪澤名也連屬也徒洲洲名也

龜珠角齒

皮革羽毛所以備賦用以戒不虞者也

龜所以備吉凶珠所以禦

火災角所以為弓齒所以為弭皮虎豹皮也所以為茵韃革犀兕也所以為甲冑羽鳥羽也所以為旌毛

斃牛尾也所以注竿首

所以共幣帛以賓享於諸侯者也

享獻也

若諸侯之好幣具而導之以訓辭有不虞之備而皇

神相之寡君其可以免罪於諸侯而國民保焉此楚
國之寶也若夫白珩先王之玩也何寶之焉圉聞國之
寶六而已明王聖人能議制百物以輔相國家則寶
之玉足以庇蔭嘉穀使無水旱之災則寶之祭祀龜
足以憲臧否則寶之珠足以禦火災則寶之水精禦
火災
金足以禦兵亂則寶之山林藪澤足以備財用則寶
之若夫譱囂之美楚雖蠻夷不能寶也譱囂刺簡子
鳴玉以相也

事見檀弓

晉獻公之喪秦穆公使人弔公子重耳

平聲耳 獻公殺其世子申生

重耳避難出奔是時在狄就弔之

且曰寡人聞之亡國恒於斯得國

恒於斯雖吾子嚴然在憂服之中喪亦不可久也時

亦不可失也孺子其圖之

嚴本作儼喪去聲

以告舅犯

舅犯重耳

之舅狐偃也字子犯

舅犯曰孺子其辭焉喪人無寶仁親以為

寶父死之謂何又因以為利

欲反國求為後是利父死

而天下其

孰能說之孺子其辭焉

說猶解也

公子重耳對客曰君惠

弔亡臣重耳身喪父死不得與於哭泣之哀以為君

憂

與音預

父死之謂何或敢有他志以辱君義稽顙而

不拜哭而起起而不私

他志謂私也

子顯以致命於穆公

穆公曰仁夫公子重耳夫稽顙而不拜則未為後也故不成拜哭而起則愛父也起而不私則遠利也

喪祭用冰者也

禮喪大記君設大盤造冰焉大夫設夷盤造冰焉士併瓦盤無冰設牀檀第有枕含一牀襲一牀遷尸于堂又一牀皆有枕席君大夫士一也

造猶納也檀第袒簀也謂無席

如浴時牀也禮自仲春之後尸既襲既小歛先納冰
盤中乃設牀於其上不施席而遷尸焉秋涼而止士
不用冰以瓦為
盤併以盛水耳

周禮天官凌人掌冰正歲十有二月令斬冰三其凌

春始治鑑凡外內饗之膳羞鑑焉凡酒漿之酒醴亦

如之祭祀共冰鑑賓客共冰

凌冰室也鑑如甌大口以盛冰置食物酒醴于

中以禦熱氣防變色失味也甌音綽今大瓦盆屬

大喪共夷盤冰

鄭氏曰夷之言尸也

實冰于盤中置之尸牀之下所以寒尸尸之盤曰夷
槃牀曰夷牀衾曰夷衾移尸曰夷于堂皆依尸而為
言

或問

經一章

其所以固其肌膚之會筋骸之束

禮禮運故禮義也者人之大端也所以講信修睦而固人肌膚之會筋骸之束也

周子所謂無極之真二五之精妙合而凝者

太極圖說無極之真二五之精妙合而凝乾道成男坤道成女二氣交感化生萬物萬物生生而變化無

窮馬

格者極至之謂如格于文祖之格

書舜典

弊車羸馬亦為人耳

唐書循吏傳賈敦頤

曹州人

貞觀時數

音朔

歷州刺史資

廉絜入朝常盡室行車一乘

去聲

敝甚羸馬繩羈

羸瘦羈鞅

以繩為之不用裝飾昭其儉也

傳二章

周武王踐祚之初受師尚父丹書之戒退而於其几席觴豆刀劍戶牖莫不銘焉今其遺語尚幸頗見於禮書

大戴禮武王踐祚篇武王踐祚三日

踐猶登也祚位也人君登寶位

謂之踐祚也

召士大夫而問焉曰惡

平聲

有藏之約而行之

萬世可以為子孫常者乎皆曰未得聞也然後召師

尚父而問焉

尚父大公望呂氏詳見孟子離婁上

曰黃帝顓帝之道可

得而見與

平聲

師尚父曰在丹書王欲聞之則齊

側皆反下

同矣王齊三日王端冕師尚父亦端冕奉書而入王

東面而立尚父西面道書之言曰敬勝怠者吉怠勝
敬者滅義勝欲者從欲勝義者凶凡事不强則枉弗
敬則不正枉者滅廢敬者萬世王聞書之言惕若恐
懼而為戒書於席四端為銘焉銘曰安樂必敬無行
可悔一反一側亦不可不志殷監不遠視爾所代

几銘曰皇皇惟敬口口生敬口口生垢口口戕口 鑑銘
曰見爾前慮爾後 盤銘曰與其溺於人也寧溺於
淵溺於淵猶可游也溺於人不可救也 楹銘曰毋

曰胡殘其禍將然母曰胡害其禍將大母曰胡傷其

禍將長 杖銘曰於乎危亡於忿戇於乎失道於嗜

慾於乎相忘於富貴

於乎之於音烏

帶銘曰火滅修容慎

戒必共共

並音恭

則壽

屨銘曰慎之勞勞則富

觴

豆銘曰食自杖食自杖戒之驕驕則逸 戶銘曰夫

名難得而易失無勤弗志而曰我知之乎無勤弗及

而曰我知之乎擾阻以泥之若風將至先搖搖雖有

聖人不能為謀 牖銘曰隨天之時以地之財敬祀

皇天敬以先時 劒銘曰帶之以為服動必行德行
德則興倍德則崩 弓銘曰屈申與伸同之義廢之行
之無忘息過 矛銘曰造矛造矛少間弗忍終身之
羞余一人所聞以戒萬世子孫

傳三章

亦未必不為尾生白公之為也

莊子盜跖篇尾生與女子期於梁下

尾生一本作微生與女子相期

約於橋梁之下

女子不來水至不去抱梁柱而死

又出抱朴子

左傳哀公十六年楚太子建之遇讒也

楚平王太子名建費無極

為少師不得寵愛於太子故讒譖太子於平王

自城父奔宋

城父今襄城城父縣故使太子

居之無極言於楚王曰建與伍奢將以方城之外叛自以為猶宋鄭也王信之使城父司馬奮揚殺太子

未至奮揚知太子冤故遣令

又辟華氏之亂於鄭

宋

氏向氏為亂建辟而奔鄭

鄭人甚善之又適晉與晉人謀襲鄭乃

求復焉鄭人復之如初晉人使諒於子木

子木即太子建晉人

使諒伺之

請行而期焉子木暴虐於其私邑邑人訴之鄭

人省之得晉諜焉遂殺子木其子曰勝在吳子西欲

召之

楚令尹子西即公子申

葉公曰

即葉公子高沈諸梁也

吾聞勝也

詐而亂無乃害乎子西曰吾聞勝也信而勇不為不

利舍諸邊竟

音境

使衛藩焉葉公曰周仁之謂信率義

之謂勇吾聞勝也好復言

言之所許必欲復行之不顧道理

而求死

士殆有私乎復言非信也期死非勇也子必悔之弗

從召之使處吳竟為白公

白楚邑楚邑宰皆僭稱公

請伐鄭子西

曰楚未節也

言楚國新復政今猶未得節制

不然吾不忘也他日又

請許之未起師晉人伐鄭楚救之與之盟勝曰鄭人

在此讎不遠矣勝自厲劒子期之子平見之曰王孫

何自厲也曰勝以直聞不告女

汝音

庸為直乎將以殺

爾父平以告子西子西曰勝如卵余翼而長之楚國

第

且楚國用士之次第

我死令尹司馬非勝而誰勝聞之曰令

尹之狂也得死乃非我子西不悛勝謂石乞

石乞勝之徒黨

曰王與二卿士皆五百人當之則可矣乞曰不可得

也曰

白公曰

市南有熊宜僚者若得之可以當五百人

矣乃從白公而見之與之言說告之故辭承之以劒

不動勝曰不為

去聲

利諂不為威惕不洩人言以求媚

者去之吳人伐慎白公敗之請以戰備獻

白公請以與吳戰之

所得鎗仗兵器皆出而獻之欲因以作亂

許之遂作亂秋七月殺子西子

期于朝而劫惠王

傳五章

所謂思曰睿睿作聖董子所謂彊勉學問則聞見博而智益明

書洪範二五事一曰貌二曰言三曰視四曰聽五曰

思貌曰恭言曰從視曰明聽曰聰思曰睿恭作肅從

作又明作哲聰作謀睿作聖

思而作睿則無所不通而成聖

西漢董仲舒傳

廣川人也

仲舒以賢良對策曰彊上聲勉學

問則聞見博而智益明彊勉行道則德日起而大有功此皆可使還至而立有效者也

文言所謂學聚問辨

易乾卦君子學以聚之問以辨之寬以居之仁以行

之

學聚問辨進德事也
寬居仁行居業事也

劉子所謂天地之中

劉子周頃王
季子定王弟

左傳成公十三年劉康公成肅公會晉侯伐秦

劉成
食采

之邑名康
肅皆謚

成子受脤

市軫
反

于社

成子即成肅公
社之肉也盛以脤器

故曰
脤

不敬劉子曰吾聞之民受天地之中以生所謂

命也是以有動作禮義威儀之則

則法
也

以定命也能

者養之以福不能者敗以取禍

程子所謂天然自有之中

近思錄伊川曰凡物有本末不可分本末為兩段事

金
洒掃應對是其然也必有所以然楊子拔一毛不為
墨子又摩頂放踵為之此皆是不得中至如子莫執
中欲執此二者之中不知怎麼執得識得則事事物
物上皆天然有箇中在那上不待人安排也安排着
則不中矣

張子所謂萬物之一原

正蒙書誠明篇性者萬物之一原非有我之得私也
惟大人為能盡其道

邵子所謂道之形體者

文集性者道之形體也道妙而無形性則仁義禮智具而體著矣

欲藏形匿景

莊子漁父篇人有畏影惡

去聲

迹而去之走者舉足愈

數

音朔

而迹愈多走愈疾而影不離身自以為尚遲疾

走不休絕力而死不知處陰以休影處靜以息迹愚亦甚矣

金匱要略卷之三
速貧速朽之論

詳見滕文公上

樂毅所謂慊於志

史記列傳樂毅遺燕惠王書略曰

毅先祖樂羊為魏文侯將後為靈壽人

自五伯已來功未有及先王者也先王以為慊於志

漢書所謂嘆栗姬

西漢外戚傳景帝立齊栗姬男為太子而王夫人男為膠東王長公主嫖有女欲與太子為妃栗姬妬而景帝諸美人皆因長公主見得貴幸栗姬日怨謝長

公主不許長公主欲與王夫人王夫人許之會薄皇后廢長公主曰譖栗姬短景帝嘗屬諸姬子曰吾百歲後善視之栗姬怒不肯應言不遜景帝心銜之而未發也長公主曰譽王夫人男之美帝亦自賢之又耳曩者夢日符計未有所定王夫人知噉栗姬又陰使人趣大臣立栗姬為皇后大行奏事文曰子以母貴母以子貴今太子母號宜為皇后帝怒曰是乃所當言耶遂案誅大行而廢太子為臨江王栗姬愈恚

於避反不得見以憂死卒立王夫人為皇后男為太子

仰面貪看鳥回頭錯應人

唐杜少陵漫成詩

傳九章

漢之光武亦賢君也一旦以無罪黜其妻

云云

後漢鄧

音質

惲

音蘊

傳

惲字君章汝南西平人為太子侍講再遷長沙太守

郭皇后廢

后光武之后也諱聖通真定素人以寵衰數懷怨懟

上怒建武十七年十月廢為中山王太后立貴人陰

氏為皇后詔曰異常之事

非國休福不得上壽稱慶

惲乃言於帝曰臣聞夫婦

非國休福不得上壽稱慶

惲乃言於帝曰臣聞夫婦

非國休福不得上壽稱慶

惲乃言於帝曰臣聞夫婦

非國休福不得上壽稱慶

之好父不能得之於子況臣能得之於君乎是臣所不敢言雖然願陛下念其可否之計無令天下有議社稷而已帝曰憚善恕已量主知我必不有所左右而輕天下也

所謂絜之百圍

莊子人間世篇匠石之齊至于曲轅見櫟社樹其大蔽牛絜之百圍

賈子所謂度長絜大

過秦論

賈子名誼洛陽人漢文帝時官至博士

試使山東之國與陳涉

度

鐸音

長絜大比權量力則不可同年而語矣

趙由之為守則易尉而為尉則陵守

史記酷吏傳周陽由者其父趙兼以淮南王舅

兼厲王母

弟也父侯周陽故因姓周陽氏由以宗家任為郎

按與國家

有外戚因屬比於宗室故曰宗家也事孝文及景帝景帝時由為郡守

武帝即位吏治尚循謹甚然由居二千石中最高為暴

酷驕恣所愛者撓法活之所憎者曲法誅滅之所居

郡必夷其豪為守視都尉如令為都尉必陵太守奪
之治與汲黯俱為忤司馬安之文惡俱在二千石列
同車未嘗敢均茵伏均等也茵車
伏憑軾也由後為河東都尉
時與其守勝屠公爭權相告言罪勝屠即
申屠也勝屠公當
抵罪義不受刑自殺而由棄市自甯成周陽由之後
事益多民巧法大抵吏之治類多成由等矣

傳十章

王肅事上而好人佞已

魏志王肅傳肅太和中拜散騎常侍

肅朗之子字子雍東海郡人

史評曰劉實以為肅方事上而好下佞已此一反也

洪範八政食貨為先

書洪範三八政一曰食

謂務農重穀之政也

二曰貨

謂阜通貨財之政

三曰祀四曰司空五曰司徒六曰司寇七曰賓八曰

師

後世頭會箕歛

西漢陳餘傳秦為亂政外內騷動百姓罷

音疲

敝頭會

箕斂以供軍費

秦法吏到民家計人頭數出粟以箕斂之為軍需之資

財匱力

盡

商紂以自焚而起鉅橋鹿臺之財

史記紂使師涓作新淫聲北里之舞靡靡之樂厚賦

稅以實鹿臺之財而盈鉅橋之粟益收狗馬奇物充

仞宮室益廣沙丘苑臺多取野獸蜚鳥置其中慢於

鬼神大最樂戲於沙丘

徐廣曰最一作聚

以酒為池縣肉為

林為長夜之飲百姓怨望而諸侯有畔者周武王於

是遂率諸侯伐紂亦發兵距之牧野甲子日紂兵
敗紂走入登鹿臺衣其寶玉衣赴火而死周武王遂
斬紂頭縣之白旗

書武成乃反商政政由舊釋箕子囚封比干墓式商
容閭散鹿臺之財發鉅橋之粟大賚于四海而萬姓
悅服

德宗以出走而豐瓊林大盈之積

唐書陸贄傳

贄字敬輿蘇州嘉興人事德宗官中書
侍郎中書門下平章事贈兵部尚書諡

宣曰始帝播遷府藏委棄

帝德宗也諱适代宗長子朱泚反帝出走在外

至是

天下貢奉稍至乃於行在夾廡署瓊林大盈二庫別藏貢物贄諫以為瓊林大盈於古無傳今師旅方殷瘡痛呻吟之聲未息遽以珍貢私別庫恐羣下有所觖望

不滿所望

請悉出以賜有功給軍賞瓊怪纖麗無得

以供帝悟即撤其署

公儀子拔園葵去織婦

史記列傳公儀休者魯博士也以高第為魯相

休即公儀

也子食茹而美拔其園葵而棄之

食其菜曰茹謂食祿者不得與下民爭利

見其家織布好而疾出其家婦燔其機

燔焚也

云欲令

農夫工女安所讎其貨乎

讎售也

董子因有與之齒者去其角傳之翼者兩其足之喻

西漢董仲舒傳仲舒以賢良對策曰夫天亦有所分

去聲予

上聲

予之齒者去其角

言天生萬物賦予以分定謂牛無上齒則有角其餘

無角者則有上齒

傳其翼者兩其足

傳讀曰附附著也言鳥不四足

是所受

大者不得取小也古之所予祿者不食於力不動於

末

末謂工商之業也

是亦受大者不得取小與天同意者也

猶有用桑弘羊孔僅宇文融楊慎矜陳京裴延齡之徒

以敗其國

桑弘羊

洛陽賈人之子漢武帝時為治粟都尉領大農盡管天下鹽鐵作平準之法令遠方各以

其物如異時商賈所轉販者為賦而相灌輸置平準于京師都受天下委輸大農諸官盡籠天下之貨物貴即賣之賤則買之欲使富商大賈無所牟大利又請令吏得入粟補官及罪人贖罪於是賜爵左庶長是時小旱上令官求雨卜式言曰縣官當食租衣稅而已今弘羊令吏坐市列肆販物求利烹弘羊乃雨後為御史大夫昭帝朝與燕王旦謀反坐誅并宗族悉誅之

孔僅

漢武帝朝為大農丞領鹽鐵事南陽大冶致生

貨物白金稍賤民不寶用竟廢之於是禁郡國無鑄錢專令上林三官鑄錢令天下非三官錢不得行

宇文融

京兆萬年人隋平昌公敬裔孫辨給多詐唐玄宗朝為富平主簿由監察御史陳便宜請

校天下籍取匿戶羨田佐用度玄宗除為覆田勸農使鉤檢帳符得偽勲亡丁甚眾擢兵部員外郎兼侍御史括正州縣丘畝招徠戶口而分業之又兼租地安輯戶口使於是諸道收沒戶八十萬田亦稱是歲終羨錢數百萬緡帝悅引拜御史中丞廣置使額以侈上心百姓怨恐有司劾融交不逞作威福其息受賊饋狼藉乃貶融平樂尉歲餘司農發融在汴州給隱官息錢巨萬給事中馮紹烈深文推證詔流于嶠州道廣州惶恐而卒

楊慎矜

隋齊正暎曾孫唐玄宗朝為御史知雜事議輸物有汙傷責州縣償所直轉輕貴入京師

自此天下調發始煩後拔御史中丞以蓄識緯妖言賜死

陳京

字慶復陳宜都王叔明五世孫事唐德宗帝討李希烈財用闕京為給事中與戶部侍郎趙贊

請稅民屋架籍賈人貲力以率貸之內怨外忿後以事罷為秘書少監卒

裴延齡

河中河東人唐德宗朝為司農少卿領度支不善財計乃廣鉤距取宿奸老吏與謀以固

帝幸因建言左藏天下歲入不貲耗登不可校請列別舍以檢盈虛於是以下天下宿負八萬緡折為負庫抽貫三百萬緡為贖庫樣物三十萬緡為季庫帛以素出以色入者為月庫帝皆可之然天下負皆窮人償入無期抽貫與給皆盡樣物與帛固有籍又請以京兆苗錢市草千萬俾民輸諸苑延齡資苛刻又劫

于利專剥下附上肆騁謫怪時人側目屬疾卧第載
度支官物輸之家無敢言死人語以相安惟帝悼不
已冊贈太子太傅
上柱國謚曰繆

大學章句或問通證

欽定四庫全書

論語集註通證卷上

元 張存中 撰

序說

周禮牛人讀為犧義與牝同

犧音特又餘式之式二反牝餘式反

地官司徒上牛人掌養國之公牛以待國之政令凡

祭祀共其享牛求牛以授職人而芻之

享牛前祭一日之牛也求

牛禱於鬼神祈求福之牛也職讀為犧犧謂之牝可以繫牛犧人者謂牧人充人與芻牲之芻牛人擇於公牛之中而以授養之

魯世家以此以上皆為十二年事

史記十二年使子路毀三桓城收其甲兵孟氏不肯

墮城

墮毀也
墮同

伐之不克而止季桓子受齊女樂孔子

去

史記以論語歸與之歎為在此時

孔子世家季康子於是使使召冉求冉求將行孔子
曰魯人召求非小用之將大用之也是日孔子曰歸
乎歸乎吾黨之小子狂簡斐然成章吾不知所以裁

之

史記云書社地七百里

孔子世家孔子使子貢至楚楚昭王興師迎孔子然

後得免昭王將以書社地七百里封孔子

索隱曰古者二十五

家為里里則各立社則書社者書其社之人名於籍蓋以七百里書社之人封孔子也故冉求云雖累千社而夫子不利是也饒氏曰書社猶今人所謂書會也蓋卿大夫所當得底地謂之采地如這箇却是君之所特與故謂之書社地言以此養其徒也便如齊王欲中國授孟子室養弟子以萬鍾相似

弟子顏子最賢蚤死後唯曾子得傳孔子之道

史記仲尼弟子列傳顏回者魯人也字子淵少孔子

三十歲年二十九髮盡白蚤死

按家語亦云年二十九而髮白三十二早

死孔子曰自吾有回門人日益以德行著名孔子稱其仁焉

孔子哭之慟曰自吾

有回門人益親

家語弟子解曾參南武城人字子與

史記字子與

少孔子

四十六歲志存孝道故孔子因之以作孝經

史記云孔子以

為能通孝道故授之業作孝經

韓文原道惟孟子師子思子思之學出於曾子自孔

子沒獨孟子之傳得其宗

詳見孟子序說

學而篇

學而時習章

坐如尸立如齊

側皆反

曲禮上坐如尸

視貌正

立如齊

磬耳聽

不見是而無悶

乾卦文言

道千乘之國章

節以制度不傷財不害民

節卦彖辭

禮之用章

禮勝則離樂勝則流

禮樂記樂勝則流禮勝則離合情飾貌者禮樂之事也

富而好禮章

安處善樂循理

董仲舒策孔子曰天地之性人為貴明於天性知自貴於物知自貴於物然後知仁義知仁義然後重禮節重禮節然後安處善安處善然後樂循理樂循理然後謂之君子

子貢貨殖

家語子貢家富累千金好販與時轉貨

買賤賣貴以殖其貨

為政篇

為政以德章

北極天之樞也

晉天文志天體如鳥卵天包地外地居其中猶卵之裏黃天半覆地上半在地下見隱各一百八十二度強北極出地上三十六度南極入地下亦三十六度嵩高正當天之中極南五十五度當嵩高之上南北極持其兩端天與日月星辰皆斜而回轉

熊氏曰北極當地上

常見不隱經星隨天左旋日月五緯右轉更迭隱見皆若環繞而歸向之也

詩三百章

魯頌駉篇之辭

卒章駉駉牡馬在坵之野薄言駉者有駉音有駉音

有驪

音

有魚以車祛祛

起居反

思無邪思馬斯徂

經禮三百曲禮三千亦可以一言蔽之曰毋不敬

禮器禮有大有小有顯有微大者不可損小者不可

益顯者不可揜微者不可大也故經禮三百曲禮三

千其致一也

經禮儀禮也如士諸侯冠禮之類此是大節有三百條曲禮禮記也如冠禮始

如再加三加坐如尸之類此是小目有三十餘條

曲禮上毋不敬

毋者禁止之辭敬者

主一無適之謂言毋得不敬
也此一句乃禮書綱領也

吾十有五章

聲為律身為度

史記夏紀禹為人敏給克勤其德不違其仁可親其
言可信聲為律身為度

色難章

孝子之有深愛者

六云

禮祭義

子奚不為政章

孔子不仕故或人疑其不為政也

史記孔子世家定公立五年魯自大夫以下皆僭離
於正道故孔子不仕退而修詩書禮樂弟子彌衆至
自遠方莫不受業焉

子張問十世章

三統謂夏正建寅為人統商正建丑為地統周正建子
為天統

前漢律歷志天統之正始於子半日萌色赤地統受之於丑初日肇化而黃至丑半日芽化而白人統受之於寅初日蓂成而黑至寅半日生成而青

禮檀弓夏后氏尚黑殷人尚白周人尚赤

疏曰夏正物之始生

其色尚黑以寅為朔殷正物之芽其色尚白以雞鳴為朔周正其色尚赤以夜半為朔鄭康成以為自古皆改正朔孔安國曰湯承堯舜禪代之後革命朔制是湯始改朔

八佾篇

季氏八佾舞於庭章

天子八諸侯六大夫四士二

左傳隱公五年九月考仲子之宮將萬焉公問羽數

於衆

音終

仲對曰天子用八諸侯用六大夫用四士二

夫

平聲

舞所以節八音而行八風故自八以下公從之

杜預曰人如佾數
服虔曰每佾八人

林放問禮之本章

禮始諸飲食故汙尊而抔飲

禮運夫禮之初始諸飲食其燔黍捭

音擘

豚汙

音蛙

尊而

杯

反 步侯

飲蕢

反 苦怪

桴而土鼓猶若可以致其敬於鬼

神

古未有釜甑釋米脾肉加於燒石之上而食之耳
汙尊鑿地為尊也杯飲手掬之也蕢讀為缶塹也

謂搏土為桴也土
鼓築土為鼓也

徑情而直行

禮檀弓下子游曰禮有微情者

踊 節 哭

有以故興物者

喪經
之制

有直情而徑行者戎狄之道也

哭踊無節
衣服無制

季氏旅於泰山章

禮諸侯祭封內山川

王制天子祭天地諸侯祭社稷大夫祭五祀天子祭

天下名山大川五嶽視三公四瀆視諸侯

視者視其牲器之數

諸侯祭名山大川之在其地者

魯人祭泰山晉人祭河是也

巧笑倩兮章

考工記曰繪畫之事後素功

周禮冬官考工記上畫績之事青與赤謂之文赤與白謂之章白與黑謂之黼黑與青謂之黻五采備謂之繡凡畫績之事後素功

甘受和白受采忠信之人可以學禮

禮禮器君子曰甘受和白受采忠信之人可以學禮

苟無忠信之人則禮不虛道

道猶行也

禘自既灌而往者章

禘王者之大祭也

禮喪服小記王者禘其祖之所自出以其祖配之

大禘

祭也始祖感天神靈而生祭天則以祖配之

大傳禮不王不禘王者禘其祖之所自出以其祖配

之

成王以周公有大勲勞賜魯重祭

禮明堂位昔殷紂亂天下脯鬼侯以饗諸侯

以人肉為薦羞

惡之甚也

是以周公相武王以伐紂武王崩成王幼弱周

公踐天子之位以治天下六年朝諸侯於明堂制禮

作樂頒度量而天下大服

度謂大尺量謂豆區斗斛筥筥

七年致政

於成王成王以周公為有勲勞於天下是以封周公

於曲阜地方七百里革車千乘

曲阜魯地革車兵車也

命魯公

世世祀周公以天子之禮樂

祭統昔者周公有勲勞於天下周公既沒成王康王追念周公之所以勲勞者而欲尊魯故賜之以重祭外祭則郊社是也內祭則太嘗禘是也夫太嘗禘升歌清廟下而管象朱干玉戚以舞大武八佾以舞大夏此天子之樂也康周公故以賜魯也

夫子嘗曰我欲觀夏道又曰我欲觀周道

禮禮運孔子曰我欲觀夏道是故之杞而不足徵也

吾得夏時焉

得夏四時之書也其書存者有夏小正

我欲觀殷道是故

之宋而不足徵也吾得坤乾焉

得殷陰陽之書也其書存者有歸藏

坤

乾之義夏時之等吾以是觀之

孔子曰嗚呼哀哉

我觀周道幽厲傷之吾舍魯何適矣魯之郊禘非禮也周公其衰矣

祭如在章

七日戒三日齋必見所祭者

禮坊記子云七日戒三日齋

側皆反

承一人焉

戒謂散齋也承

猶事也

祭義致齊於內散齊於外齊之日思其居處思其笑語思其志意思其所樂思其所嗜齊三日乃見其所

為齊者

致齊思此五者也散齊七日不御不樂不弔其見所為齊者思之熟也所嗜素所欲飲食

也春秋傳曰屈到者羹

祭之日儗

音愛

然必有見乎其位周還

音旋

出戶肅然必有聞乎其容聲出戶而聽愾

音慨

然必有

聞乎其歎息之聲

寧媚於竈章

竈五祀之一

禮月令孟春之月其祀戶祭先脾孟夏之月其祀竈
祭先肺中央土其祀中霤祭先心孟秋之月其祀門
祭先肝孟冬之月其祀行祭先腎

子入大廟章

魯周公廟

公羊傳文公十三年周公稱大廟魯公稱世室羣公
稱宮周公何以稱大廟于魯封魯以為周公也周公

拜乎前魯公拜乎後

始受封時拜于文王廟也

曰生以養周公死

以為周公主

射不主皮章

記曰武王克商

樂記武王克殷反商濟河而西散軍而郊射

散軍則不廢農

事郊射則不忘武備射宮在郊故曰郊射

左射狸首右射騶虞而貫革之

射息也

貫革者射穿甲革所以主皮也以樂為節則無事乎貫革矣

子貢欲去告朔之餼羊章

季冬頒來歲十二月之朔

周禮春官大史正歲年以序事頒之于官府及都鄙

頒告朔于邦國

天子頒朔于諸侯諸侯藏之祖廟至朔朝于廟告而受行之鄭司農云頒

讀為班班布也以十二月朔布告天下諸侯

特羊告廟

禮玉藻天子立端而朝日於東門之外聽朔於南門

之外閏月則闔門左扉立于其中

端當為冕字之誤也凡聽朔必以特

牲告其帝及神配以文王武王疏曰天子告朔以特牛諸侯告朔以羊其朝享各依四時常禮故用太牢

魯自文公始不視朔

春秋文公六年閏月不告月猶朝于廟左傳閏月不告朔非禮也閏以正時時以作事事以厚生生民之道於是乎在矣不告閏朔棄時政也何以為民

公羊文公十六年夏五月公四不視朔公曷為四不視朔公有疾也何言乎公有疾不視朔自是公無疾不視朔然則曷為不言公有疾不視朔有疾猶可言也無疾不可言也

管仲之器小哉章

三歸臺名事見說苑

劉向說苑善說篇齊桓公立仲父致大夫曰善吾者
入門而右不善吾者入門而左有中門而立者桓公
問焉對曰管子之知可與謀天下其強可與取天下
君恃其信乎內政委焉外事斷焉民而歸之是亦可
奪也桓公曰善乃謂管仲政則卒歸於子矣政之所
不及唯子是匡管仲故築三歸之臺以自傷於民

仲乃

乙娶三姓而備九女故築三歸之
臺觀以處之是自傷於民力也

揚雄所謂大器

揚子先知篇或曰齊得夷吾而霸仲尼曰小器請問

大器大器其猶規矩準繩乎先自治而後治人之謂

大器

規矩先自方圓然後能使物方圓準繩先自平直然後能使物平直此之謂大器管子不知禮

豈足以為
大器哉

桓公內嬖六人

左傳僖公十七年齊侯之夫人三王姬徐羸蔡姬皆

無子齊侯好內

內女色也

多內寵內嬖如夫人者六人長

衛姬生武孟

有衛姬二故長必別之武孟即公子無虧

少衛姬生惠公

惠公

即公子元

鄭姬生孝公

孝公即公子昭

葛嬴生昭公

昭公即公子潘

密姬

生懿公

懿公即公子商

宋華子生公子雍

宋華氏子姓之女生公子雍

何患於喪乎章

喪欲速貧

見滕文公上

里仁篇

觀過斯知仁矣章

後漢吳祐謂掾以親故受汙辱之名

吳祐傳

祐字季英陳留長垣人

順帝時以光祿四行遷膠東侯

相

四行謂敦厚質樸遜讓節儉也

祐政唯仁簡以身率物吏人懷而

不欺嗇夫孫性私賦民錢市衣以進其父

嗇夫小吏也執役之

賤職者姓孫名性為嗇夫私斂民錢五百市買單衣以進與父

父得而怒曰有君如

是何忍欺促歸伏罪

促迫性令性祐所出受私賦之罪

性慙懼詣閣

持衣自首

性慙惡恐懼遵父命持單衣詣祐閣下伏罪出首

祐屏

音

左右問

其故性具談父言祐曰掾以親故受汙穢之名所謂

觀過斯知仁矣使歸謝父還以衣遺

去聲之使性歸家謝父教命

仍以所市衣遺其父憐其孝也

無適也章

春秋傳曰吾誰適從

左傳僖公五年晉侯使士蒍

音去委為聲

二公子築蒲與

屈士蒍退而賦曰狐裘

音去蒙茸

音戎以狐腋為裘貴者之裘也 屈士蒍亂貌

言貴者之多

一國三公

蒲屈大都耦國故獻公與二公子鼎立為三公

吾誰適從

言城不堅則為公子所訴堅之則為固仇不忠無以事君故不知所適從

事父母幾諫章

與內則之言相表裏

禮內則父母有過下氣怡色柔聲以諫諫若不入起

敬起孝說

音悅

則復諫不說與其得罪於鄉黨州閭寧

孰諫父母怒不說而撻之流血不敢疾怨起敬起孝

公冶篇

孟武伯問子路仁乎章

謂患索

音色

敝賦是也

左傳襄公八年鄭乃及楚平使王子伯駢告于晉曰

君命敝邑修而車賦

修治而汝賦兵也

倣而師徒

倣戒師旅徒衆也

以討亂略蔡人不從敝邑之人不敢寧處悉索敝賦

索盡也悉盡敝邑之兵賦

以討于蔡獲司馬燮獻于邢丘

襄公三十一年十月子產相鄭伯如晉子產使盡壞其

館之垣而納車馬焉士文伯讓之對曰以敝邑褊

必淺反

小介於大國

介間也

誅求無時

誅責也

是以不敢寧居悉索

敝賦以來會時事

孔文子何以謂之文也章

孔文子使太叔疾出其妻而妻之

左傳哀公十一年冬衛太叔疾出奔宋

太叔疾即太叔齊初

疾娶于宋子朝

子朝宋人衛大夫

其娣嬖子朝出孔文子使

疾出其妻

出宋朝之女

而妻之疾使侍人誘其初妻之娣

寘於犂

犂衛邑

而為之一宮如二妻文子怒欲攻之仲

尼止之遂奪其妻

孔文子遂奪其女不嫁太叔疾

或淫于外州外州

人奪之軒以獻

外州人奪太叔疾之軒車以獻於君

恥是二者

太叔疾以奪妻

奪軒二
事為耻

故出衛人立遺

遺疾
之弟

使室孔姑

其一反孔姑
即孔文子之

女疾之妻也使
太叔遺室之

孔文子之將攻太叔也訪於仲尼仲

尼曰胡簋之事

胡簋禮器名夏
曰胡周曰簋

則嘗學之矣甲兵之

事未之聞也退命駕而行

謚法有以勤學好問為文非經天緯地之文

史記謚法解惟周公太公嗣王業建功于牧野終
將葬乃制謚遂敘謚法謚者行之迹號者功之表

古者有大功則賜
之善號以為稱也

車服者位之章也是以大行受大名

細行受細名行出於已名生於人

名謂號謚

經緯天地文

經緯天地相錯而成如織之成文也道德博聞文勤學好問文慈惠愛民

文愍民惠禮文錫民爵位文

公叔文子之文錫民爵位之文順理而成章之

謂

子產有君子之道四焉章

如都鄙有章上下有服

左傳襄公三十年鄭子皮授子產政子產使都鄙有章上下有服田有封洫廬井有伍大人之忠儉者從

而與之泰侈者因而斃之從政一年與人誦之曰取

我衣冠而褚之

褚畜也奢侈者畏法故畜藏

取我田疇而伍之孰

殺子產吾其與之及三年又誦之曰我有子弟子產

誨之我有田疇子產殖之

殖生也

子產而死誰其嗣之

嗣續也

臧文仲章

不仁者三不知者三是也

左傳文公三年秋八月丁卯大事于太廟躋僖公逆

祀也

僖是閔兄不得為父子嘗為臣位應在下令居閔上故曰逆祀

仲尼曰臧文仲

其不仁者三不知者三下展禽

展禽柳下惠也文仲知柳下惠之賢而使

在下位不與立於朝也非已欲立而立人之道

廢六開

塞開陽開之屬凡六開所以禁絕來遊而

廢之妾織蒲

以蒲為席是與民爭利也

三不仁也作虛器

謂居蔡之室而山節

藻枕也有其器無其位故曰虛

縱逆祀

聽夏父弗忌躋僖公

祀爰居三不知也

按家語顏回篇曰置六開王肅云六開開名魯本無此闕文仲置之以執行客故為不仁傳曰廢六開未

知孰是姑并錄之

臧文仲居蔡章

祀爰居之義

國語魯語海鳥曰爰居

海鳥似鳳大如馬駒一名雛縣海有大風冬煖之災來辟

之止於魯東門之外三日

魯國東門外

臧文仲使國

人祭之

文仲以為神命人祭之非國典也難以為仁且智

令尹子文三仕為令尹章

子文姓闕名穀於菟

左傳宣公四年秋七月戊戌楚子與若敖氏戰于臯

潁

音虎臯潁楚地

遂滅若敖氏

越椒戰敗而死莊王遂滅其族

初若敖娶於

邾

音云又作鄒若教楚之八世祖娶邾國之女

生鬬伯比若敖卒從其母

畜

音蓄

於邾淫於邾子之女

伯比私淫於邾子之女

生子文焉邾

夫人使棄諸夢

音蒙又如字

中

邾女之母夫人知之使棄所生之子於夢澤之中

虎乳之邾子田見之懼而歸夫人以告

言其女私通伯比所生

遂使收之楚人謂乳穀

奴口反

謂虎於菟

音烏徒

故命之

曰鬬穀於菟以其女妻

去聲

伯比實為令尹子文

鬬氏始自

子文為令尹

崔子弑齊君

春秋襄公二十五年夏五月乙亥齊崔杼弑其君光

左傳齊棠公之妻東郭偃之姊也

棠公齊棠邑大夫

東郭偃

臣崔武子棠公死偃御武子以弔焉見棠姜而美之

遂取之莊公通焉驟如崔氏以崔子之冠賜人侍者

曰不可公曰不為崔子其無冠乎

言雖不為崔子猶自應有冠

崔

子因是又以其間

去聲

伐晉也

間晉之難而伐之

曰晉必將報

欲弑公以說于晉而不獲間公鞭侍人賈舉而又近

之乃為崔子間公

伺公間隙

五月莒子朝于齊甲戌饗諸

北郭崔子稱疾不視事

欲使公來

乙亥公問崔子

問疾

遂從

姜氏姜入于室與崔子自側戶出公拊楹而歌

歌以命姜

侍人賈舉止衆從者而入閉門甲與公登臺而請弗

許請盟弗許請自刃於廟弗許皆曰君之臣杼疾病

不能聽命近於公宮

謂崔子宮近公宮或淫者詐稱公

陪臣干

胡旦反

掇

將侯反

有淫者不知二命

干振行夜言行夜得淫人受崔子命討之不知他命

夜戒有所擊也

公踰牆又射之中股反隊

與墜同

遂弑之

子文之相楚所謀者無非僭王猾夏之事

左傳莊公三十年楚殺令尹子元以闕穀於菟為令尹僖公二十三年楚成得臣伐陳取焦夷子文以為

功使子玉為令尹

子文為令尹凡二十八年杜氏曰按莊公三十年楚成王立九年

矣僖公二十三年即成王之三十六年也楚自武王三十七年僭稱王魯桓公之八年也武王五十一年卒子文王立文王十三年卒子堵敖立堵敖五年卒弟成王立僖公元年楚成王之十四年也楚伐鄭鄭即齊故也五年楚闕穀於菟滅弦六年楚子圍許許男面縛銜璧乃釋之十二年楚人滅黃十五年楚人伐隨二十年隨以漢東諸侯叛楚楚闕穀於菟帥師伐隨取成而還二十一年宋人為鹿上之盟以求諸侯於楚楚人許之諸侯會宋公子孟楚執宋公以伐宋已而釋之二十二年楚人伐宋宋公及楚人戰于

泓宋師敗績公傷股明年宋襄公死二十三年
楚師伐陳討其貳於宋也此僭王猶夏之事也

又不數歲而復反於齊焉

左傳襄公二十七年宋向戌欲弭諸侯之兵以為名

欲獲息民之名

如晉告趙孟晉人許之如楚楚亦許之如齊

齊人難之陳文子曰晉楚許之我焉得已且人曰弭

兵而我弗許則固攜吾民矣將焉用之齊人許之

杜氏

曰按襄公二十五年崔杼弑齊君是時陳文子出奔
二十六年不經見至二十七年文子有弭兵之說則

文子自出奔復
反於齊凡二年

三思而後行章

使晉而求遭喪之禮以行

左傳文公六年秋季文子將聘于晉使求遭喪之禮

以行其人曰將焉

音煙

用之文子曰備豫不虞古之善

教也求而無之實難過求何害

過求不用何害於事此所謂季文子三思

而後行也

宣公篡立文子不能討反為使齊而納賂焉

左傳文公十八年二月公薨文公二妃敬嬴生宣公

敬嬴嬖而私事襄仲宣公長而屬諸襄仲襄仲欲立

之叔仲不可

叔仲惠伯

仲見于齊侯而請之齊侯新立而

欲親魯許之冬十月仲殺惡及視而立宣公

惡太子視其母

弟殺視不書賤之也

宣公元年夏季文子如齊納賂以請會

宣公

篡立未列於會故以賂請之

會于平州

平州齊地在今太山牟縣西

以定公位

篡立

者諸侯既與之會則不得討臣子殺之與弑君同故公與齊會而位定

甯武子其知可及也其愚不可及也章

成公無道至於失國而武子周旋其間盡心竭力不避

艱險

左傳僖公二十八年衛侯聞楚師敗

楚成王與晉文公戰于城濮衛

地也楚師敗績

懼出奔楚

初晉侯將伐曹假道于衛衛弗許晉伐衛衛侯請盟

晉人弗許衛侯欲與楚國人不欲故出其君以說于晉衛侯聞楚敗出居襄牛之地以避晉而遂奔楚

遂適陳使元咺奉叔武以受盟

元咺衛大夫叔武衛侯弟奉叔武使攝君

事以受盟于踐土

癸亥王子虎盟諸侯于王庭或訴元咺於

衛侯曰立叔武矣其子角從公公使殺之咺不廢命

奉夷叔以入守

音狩夷叔即武叔

六月晉人復衛侯甯武子

與衛人盟于宛濮

寧武子寧俞也時從衛侯在外故與衛人盟于宛濮之地

曰書

曰天禍衛國君臣不協以及此憂也今天誘其衷使

皆降心以相從也不有居者誰守社稷不有行者誰

捍牧圉不協之故用昭乞盟于爾大神以誘天衷自

今日以往既盟之後行者無保其力居者無懼其罪

有渝此盟以相及也明神先君是糾是殛國人聞此

盟也而後不貳衛侯先期入寧子先

寧武子患公之欲速故先入欲

安喻國人

長牂

音

駐守門以為使

去聲

也與之乘

去聲

而入

長牂與寧

子共載而八國

公子歃

市專也

大華

去聲

仲前驅

衛侯遂驅掩密子未備二子並

衛大夫

叔武將沐聞君至喜捉髮走出前驅射而殺之

公知其無罪也枕去聲之股而哭之歃犬走出公使殺

之元咺出奔晉冬會于溫討不服也衛侯與元咺訟

甯武子為輔鍼

音鉗

莊子為坐

坐獄為主

士榮為大士

大士治獄

官也周禮命夫命婦不躬坐獄訟元咺又不宜與君對坐故使鍼莊子為坐又使衛之忠臣及其獄官質

正元咺傳曰王叔之宰與伯與之大夫坐獄於衛侯王庭各不身親蓋今勘更有罪先驗更卒之義

不勝

三子解屈故不勝

殺士榮則

音月

鍼莊子謂甯俞忠而免

之執衛侯歸之于京師寘諸深室甯子職納橐

音託

音旃

甯俞以君在幽隘故親以衣食為已職橐衣囊體康也言其忠至所慮者深

元咺歸

于衛

衛侯既執故元咺得歸于衛

立公子瑕

瑕衛公子適也元咺立之以為君

僖

公三十年夏晉侯使醫衍酖

音鴆

衛侯

衍醫名晉文實怨衛侯欲殺之

而罪不及死故使醫因治疾而加酖毒

甯俞貨醫

甯武子視衛侯衣食得知其謀乃以貨賄

納賂于醫

使薄其酖不死公為

去聲

之請

魯僖公與衛同

玉於王與晉侯皆十穀

與王同二玉相合曰穀襄王與晉侯皆玉十珌

王許

之

襄王許之

秋乃釋衛侯

論語記甯武子此其愚不可及也杜氏曰按左氏僖公二十

五年衛文公卒子成公立僖二十六年即衛成公元年也經稱公會衛甯速盟于向速甯莊子則莊子速事成公矣至僖公二十八年傳稱甯武子與衛人盟於宛濮名俞速子即成公即位之三年也以此考之甯莊子當死于成公二年左右而子俞為大夫則武子未嘗事文公而集注謂武子仕衛當文公成公之時與此少異

孟各言爾志章

易曰勞而不伐是也

繫辭上子曰勞而不伐有功而不德厚之至也

伯夷叔齊孤竹君之二子

見下泰伯篇

雍也篇

雍也可使南面章

莊周所稱子桑戶者

莊子大宗師篇子桑戶孟子反子琴張三人相與友

伯子不衣冠而處夫子譏其欲同人道於牛馬

劉向說苑修文篇孔子見子桑伯子

伯子魯人子桑戶也子桑

伯子不衣冠而處弟子曰夫子何為見此人乎曰其

質美而無文吾欲說而文之

說音稅下同

孔子去子桑伯

子門人不說曰何為見孔子乎曰其質美而文繁吾
欲說而去其文故曰文質修者謂之君子有質而無
文謂之易野易簡易野鄙野也子桑伯子易野欲同人道於
牛馬故仲弓曰大簡

哀公問弟子孰為好學章

若舜之誅四凶

書舜典流共工窮奇于幽州放驩兜渾敦于崇山竄三苗

饕餮于三危殛鯀機于羽山四罪而天下咸服

伯牛有疾章

禮病者居北牖下君視之則遷於南牖下

喪大記疾病外內皆埽君大夫徹縣音玄士去琴瑟寢

東首於北牖下

疏曰病者雖恒在北牖下若君來視之時則暫時移向南牖下東首令君

得南面而視之

子游為武城宰章

如飲射讀法之類

周禮地官黨正春秋祭禋

音禋五百家為一黨其正於春秋二時祭日月星

辰水旱之類

國索鬼神而祭祀

歲十二月大蜡之時索鬼神萬物而祭之

則以

禮屬民而飲酒于序

序學名合聚其黨之民而行鄉飲之禮于序

以正齒

位壹命齒于鄉里

一命為下士以年與衆賓相次

再命齒于父族

再

為中士則以年與族人相次而衆賓不敢與之齒矣

三命而不齒

三命為上士則雖父族亦

不得而齒焉故席于尊東

鄉大夫以鄉射之禮五物詢衆庶

物猶事也謀於衆庶復求賢能養于

鄉學以補所興之缺

一曰和

發而中節

二曰容

動皆合禮

三曰主皮

不失正鵠

四曰和容

容體比於和

五曰興舞

節比於樂

州長春秋以禮會

民而射于州序

解同上

州長各掌其州之教治政令之法

有教則有治政令則所以輔教治者

法則其條目也

正月之吉各屬

音祝下同

其州之民而讀法

屬猶合也

聚合其州之民讀教法而示之

黨正四時之孟月吉日則屬民而讀邦法

如州長之禮三月在州三時在黨

族師各掌其族之戒令政事

百家為族戒以勅其怠忽令所以輔戒而政事則次

之月吉則屬民而讀邦法

屬民讀法州長以正月黨正以孟月族師則每月舉得

閭胥各掌其閭之徵令

二十五家為閭其胥掌其徵召之命令

以歲時

各數其閭之衆寡辨其施舍既比必二則讀法既比人

之後則讀法以戒數之

孟之反不伐章

事在哀公十一年

左傳哀公十一年齊國書高無平與五同帥師伐我孟

孺子洩帥右師孺子孟懿子之子武伯彘也冉求帥左師師及齊

師戰于郊右師奔齊人從之逐右師孟之側後入以為

殿之側孟氏族也字反抽矢策其馬曰馬不進也

子見南子章

孔子至衛南子請見

史記孔子世家孔子適衛靈公夫人有南子者使人
謂孔子曰四方之君子不辱欲與寡君為弟兄者必
見寡小君寡小君願見孔子辭謝不得已而見之夫
人在絺帷中孔子入門北面稽首夫人自帷中再拜
環佩玉聲璆然孔子曰吾鄉音向為弗見見之禮答焉
子路不說音悅孔子矢之曰子所不反浮九者天厭之天

厭之居衛月餘靈公與夫人同車宦者雍渠參乘出

使孔子為次乘招搖市過之

招搖翔也

孔子曰吾未見

好

去聲下同

德如好色者也於是醜之去衛

有見其小君之禮

春秋莊公二十四年八月丁丑夫人姜氏入戊寅大

夫宗婦覲用幣

哀姜齊襄公之女也宗婦同姓大夫之婦禮小君至大夫執贄以見明臣

子之道莊公欲奢誇夫人故使大夫宗婦同贄俱見

如云所不與崔慶者之類

左傳襄公二十五年齊崔杼

名

弑莊公立景公而相

之慶封為左相盟國人於大

音太

宮曰所不與崔慶者

晏子仰天歎曰嬰所不唯忠於君利社稷是與有如

上帝乃歆

盟書云所不與崔慶者有如上帝讀書未終晏子抄答易其辭因自歆

述而篇

述而不作章

老彭商賢大夫見大戴禮

虞德篇有商老彭之語

薛氏曰老彭殷賢大夫即莊子所謂彭祖也名鏗堯臣封

於彭城歷虞夏至商年七百歲故以久壽見世本云
姓籛名鏗在商為守藏史在周為柱下史年八百歲

自行束脩以上章

相見必執贄以為禮

禮曲禮下凡執天子啗諸侯圭卿羔大夫雁士雉庶

人之執匹

音木

童子委執而退

執之言至也童子委執而退不與成人為禮也

匹驚也

野外軍中無執以纓拾矢可也

纓馬繫纓也拾為射韉

婦

人之執棋棊脯脩棗栗

子之所慎章

齊之為言齊也

禮祭統及時將祭君子乃齊齊

側皆反

之為言齊

如字下同

也齊不齊以致齊者也

子在齊聞韶章

史記三月上有學之二字

孔子世家魯亂孔子適齊為高昭子家臣欲以通乎
景公與齊大師語樂聞韶音學之三月不知肉味齊
人稱之

夫子為衛君乎章

伯夷叔齊遜國而逃諫伐而餓

史記伯夷叔齊傳伯夷叔齊孤竹君之二子也

索隱曰孤

竹君是殷湯所封相傳至夷齊之父名初字子朝伯夷名元字公信叔齊名致字公達夷齊謚也伯仲又其長少之字也地理志孤竹城在遼西今支縣應劭云蓋伯夷之國君姓墨胎氏正義曰姓黠氏括地志云孤竹古城在盧龍縣南十二里殷時諸侯孤竹國也武王載木主號為文王

東伐紂伯夷叔齊叩馬而諫曰父死不葬爰及干戈

可謂孝乎以臣弑君可謂仁乎左右欲兵之

兵殺之也太

公曰

武王田于渭得呂尚父謂曰吾太公望子久矣號曰太公望

此義人也扶而

去之武王已平殷亂天下宗周而伯夷叔齊耻之義

不食周粟

謂不食周祿也

隱於首陽山

首陽山即雷首山之陽在河東府河東縣

南采薇而食之遂餓而死

加我數年章

史記作假我數年若是我於易則彬彬矣

孔子世家孔子晚而喜易序彖繫象說卦文言讀易
韋編三絕曰假如我數年若是我於易則彬彬矣

不知老之將至云爾章

俛焉曰有孳孳而不知年數之不足

禮表記小雅曰高山仰止景行行止子曰詩之好仁如此鄉道而行中道而廢忘身之老也不知年數之不足也俛焉曰有孳孳斃而後已

陳司敗問昭公知禮乎章

不娶同姓謂吳孟子者

禮坊記取

去聲

妻不取同姓以厚別也

厚猶遠也

故買妾不

知其姓則卜之以此坊民魯春秋猶去夫人之姓曰

吳其死曰孟子卒

魯昭公娶於吳吳亦姬姓故諱曰吳孟子者假托以為子姓也

子路請禱章

士喪禮疾病行禱五祀

儀禮士喪禮記士處適寢寢東首于北牖下有疾病

者齊

音劑憂也正情性也適寢者不齊不居其室

養者皆齊徹琴瑟疾病

外內皆埽徹褻衣加新衣御者四人皆坐持體

為不能自

轉側御者今時侍從之人

男女改服屬纊以俟絕氣

纊今之新絲易搖動置口

鼻之上
以為候

男子不絕於婦人之手婦人不絕於男子之

手乃行禱于五祀

謂門戶竈行中雷盡孝子之情
五祀博言之士二祀曰門曰行

乃

卒

泰伯篇

泰伯其可謂至德也已矣章

泰伯不從事見春秋傳

吳越春秋古公三子

古公周大王之本號也後乃尊
為大王名亶父公劉九世孫也

有三子

長曰太伯次曰仲雍一名虞仲

仲雍字
孰哉

少曰季

歷李歷娶大任

列女傳曰大姜有台氏之女大任摯任氏之中女王李之妃文王之母也

生子昌有聖瑞

尚書帝命驗云李秋之月甲子赤爵御丹書入于鄴止于昌戶其書云敬

勝怠者言怠勝敬者滅義勝欲者從欲勝義者凶凡事不强則不枉不敬則不正枉者廢滅敬者萬世以仁得之以仁守之其量百世以不仁得之以仁守之其量十世以不仁得之不仁守之不及其世此蓋聖瑞

古公知昌聖欲傳國以及昌

意欲傳國于李歷以及于昌

曰興

王業者其在昌乎因名曰季歷太伯仲雍望風知指

言二子知其意

曰歷者適也知古公欲以國及昌古公病二

人託名採藥于衡山

太伯仲雍托與大王採藥治病於衡山而讓國

遂之荊

蠻

荆者楚之舊號以州而言曰荆蠻者關地南夷之名也正義曰太伯奔吳所居城在蘇州北五十里

常州無錫縣界梅里村其城及冢見存而云亡荆蠻者楚滅越其地屬楚秦滅楚其地屬秦秦諱楚故曰荆故通號吳越之地為荆及斷髮文身

俗常在水中故斷其髮文

其身以象龍子故不見傷害

為夷狄之服示不可用古公卒太伯

仲雍歸赴喪畢還荆蠻國民而君事之自號為勾吳

吳言勾者夷之發聲猶言於越耳吳名始於太伯明以前未有吳號地在越楚之界故稱荆蠻也

吳

人或問何像為勾吳太伯曰吾以伯長居國絕嗣者也其當有封者吳仲也故自號勾吳非其方乎荆蠻

義之從而歸之者千有餘家共立以為勾吳數年之
間民人殷富遭殷之末世衰中國侯王數用兵恐及
於荆蠻故太伯起城周三里二百步外郭三百餘里
在西北隅名曰故吳人民皆耕田其中古公病將卒
令季歷讓國於太伯而三讓不受故云太伯三以天
下讓

左傳僖公五年宮之奇曰太伯虞仲太王之昭也太
伯不從是以不嗣

杜預曰不從父命俱讓適吳仲
雍支子別封西吳虞公其後也

曾子有疾章

君子曰終小人曰死

禮檀弓上君子曰終小人曰死吾今日其庶幾乎
父母全而生之子全而歸之

禮祭義樂正子春下堂而傷其足數月不出猶有憂
色門弟子曰夫子之足瘳矣數月不出猶有憂色何
也樂正子春曰善如爾之問也善如爾之問也吾聞
諸曾子曾子聞諸夫子曰天之所生地之所養無人

為大父母全而生之子全而歸之可謂孝矣不虧其體不辱其身可謂全矣故君子頃步而弗敢忘孝也今予忘孝之道予是以有憂色也

頃當為跬聲之誤也大葉反

立於禮章

固人肌膚之會筋骸之束

見大學或問

民可使由之章

朝四暮三之術

列子黃帝篇宋有狙公者

善養猿猴之人故號曰狙公

愛狙養之

成羣能解狙之意狙亦得公之心損其家口充狙之
欲俄而匱焉將限其食恐衆狙之不馴於已也先誑
之曰與若芋芋栗也一云橡子也芋音序朝三而暮四足乎衆狙
皆起而怒俄而曰與若芋朝四而暮三足乎衆狙皆
伏而喜物之以能鄙相籠皆猶此也

子罕篇

拜下禮也章

臣與君行禮當拜於堂下

儀禮燕禮為君燕卿大夫之禮公坐取大夫所酌觶興以酬賓降西階下再拜稽首公命小臣辭賓升成

拜

升成拜復再拜稽首也

子畏於匡章

陽虎曾暴於匡

史記孔子世家孔子去衛將適陳過匡顏刻為僕以其策指之曰昔吾入此由彼缺也匡人聞之以為魯之陽虎陽虎嘗暴匡人匡人於是遂止孔子孔子狀

類陽虎拘焉五日顏淵後子曰吾以汝為死矣顏淵
曰子在回何敢死匡人拘孔子益急弟子懼孔子曰
文王既没文不在茲乎天之將喪斯文也後死者不
得與於斯文也天之未喪斯文也匡人其如子何孔
子使從者為甯武子臣於衛然後得去

索隱曰家語
子路彈劍而

歌孔子和之曲三終匡人解圍而去今此取論語文
王既没之文及從者臣甯武子然後得去盖夫子再
厄匡人或說辭以解圍或彈劍而釋難今此合
論語家語之文以為一事故彼此文交互耳

太宰問於子貢曰章

太宰官名或吳或宋

史記孔子世家孔子自楚反乎衛是歲也孔子年六十三而魯哀公六年也其明年吳與魯會繒徵百牢太宰嚭召季康子康子使子貢往然後得已

宋世家殤公立以孔父嘉為司馬華督為太宰至平

公以向帶為太宰魚府為少宰

杜氏曰按春秋之時以太宰名官者惟吳

宋與魯耳吳有太宰嚭宋有太宰華督事殤公其後九世至平公乃以向帶為太宰平公即位之歲距孔子過宋歷二公八十餘年其間或廢或不雖未可知然左氏及史記亦不復載不可考也況孔子過宋時

遭桓司馬之厄遂微服而去豈復有問子貢者歟疑此太宰即吳語也吳與魯會繒語召季康子康子使子貢往焉則此當是吳太宰而亦當在此年也魯自公子翬請於隱公欲殺桓以求太宰其後不復見

欲罷不能章

非所謂窈冥昏默

莊子在宥篇黃帝曰敢問治身柰何而可以長久廣

成子臆

音厥

然而起曰善哉問乎來吾語

去聲

女至道至

道之精窈窈

鳥了反

冥冥至道之極昏昏默默無視無

聽抱神以靜

且子與其死於臣之手也章

曾子將死起而易箒曰吾得正而斃焉斯已矣

禮檀弓曾子寢疾病

曰病疾重

樂正子春坐於牀下

子春曾子

弟

曾元曾申坐於足

元申曾子之子

童子隅坐而執燭童子

曰華而晬

華板反華晬也晬明貌

大夫之箒與

平聲下同

子春曰止

曾子聞之瞿

音句

然曰呼

瞿然驚貌呼虛憊之聲

曰華而晬大夫

之箒與曾子曰然斯季孫之賜也我未之能易也元

起易箒曾元曰夫子之病革矣

革急也

不可以變

變變動

幸而至於旦請敬易之曾子曰爾之愛我也不如彼
君子之愛人也以德細人之愛人也以姑息吾何求
哉吾得正而斃焉斯已矣斃仆也舉扶而易之反席未
安而沒

子欲居九夷章

東方之夷有九種

後漢東夷傳夷有九種

竹書紀年曰后芬即位三年九夷來御也

曰畎夷

于夷方夷黃夷白夷赤夷玄夷風夷陽夷

竹書紀年曰后池二

十一年命猷夷赤夷玄夷風夷陽夷后相即位二年一
征黃夷七年于夷來賓後少康即位方夷來賓也

曰東夷九類玄菟樂浪高驪蒲飾鳧夷索豕東屠倭

人天鄙

吾未見好德如好色者也章

史記孔子居衛靈公與夫人同車

見前子見南子下

後生可畏章

曾子曰五十而不以善聞則不聞矣

修身篇曾子曰年三十四十之間而無藝則無藝矣

五十而不以善聞則不聞矣七十而未壞雖有後過亦可以免矣

衣敝緼袍章

袍衣有著者也

著音貯

禮玉藻纁

音纁

為繭緼為袍

衣有著之異名也纁謂今之新綿也緼謂今纁及舊

絮也禪

音丹

為絢

音綢有衣裳而無裏

帛為褶

有表裏而無著

未可與權章

易九卦終於巽以行權

繫辭下履以和行謙以制禮復以自知恒以一德損以遠害益以興利困以寡怨井以辨義巽以行權

鄉黨篇

朝與下大夫言章

王制諸侯上大夫卿下大夫五人

禮王制王者之制祿爵公侯伯子男凡五等諸侯之上大夫卿下大夫上士中士下士凡五等天子三公九卿二十七大夫八十一元士

此夏制也明堂位曰夏后氏之官百舉成

數也大國三卿皆命於天子下大夫五人上士二十七

人次國三卿二卿命於天子一卿命於其君下大夫五人上士二十七人小國二卿皆命於其君下大夫五人上士二十七人

揖所與立章

上公九命

周禮春官大宗伯以九儀之命正邦國之位

每命異儀貴賤

之位乃正春秋傳曰名位不同禮亦異數

壹命受職

始見命為正吏謂列國之士於子男為大

夫王之下士亦一命受職治職事

再命受服

受服受祭衣服為上士此受玄冕之服列國之

大夫再命於子男為卿卿大夫自玄冕而下如孤之服王之中士亦再命則爵弁服

三命受位

受下大夫之位此列國之卿始有列位於王為王之臣也王之上士亦三命

四命受器

受祭

器為上大夫此公之孤始得有祭器者也禮運曰大夫具官祭器不假聲樂皆具非禮也王之下大夫亦

五命賜則

則者法也地未成國之名王之下大夫四命出封加一等五命賜之以方百里

二百里之地者方三百里以上為成國王莽時以二十五城為則方五十里合今俗說子男之地獨劉子

駿等識古有此制焉

六命賜官

子男入為卿治一官也此王六命之卿賜官者使得自置其臣

治家

七命賜國

王之卿六命出封加一等者出就侯伯之國

八命作牧

謂侯

伯有功德者加命得專征伐於諸侯一州之牧王之三公亦八命

九命作伯

上公有功德者

加命為二伯得征五侯九命者長諸侯為方伯

擯用命數之半

周禮秋官司寇大行人以九儀辨諸侯之命等諸臣

之爵以同邦國之禮而待其賓客

九儀謂命者五公侯伯子男也爵者

四孤卿大夫士也

上公之禮執桓圭九寸冕服九章介九人

禮九牢擯者五人諸侯之禮執信圭七寸冕服七章

介七人禮七牢擯者四人諸伯執躬圭其他皆如諸

侯之禮諸子執轂壁五寸冕服五章介五人禮五牢
擯者三人諸男執蒲壁其他皆如諸子之禮

又擯相之容

周禮司儀掌九儀之賓客擯相之禮以詔儀容辭令

揖讓之節

出接賓曰擯入贊禮曰相以詔者以禮告王

入公門章

人君宁立之處

禮曲禮下天子當依而立諸侯北面而見天子曰覲

天子當宇而立諸公東面諸侯西面曰朝

當依而立者依狀如

屏風以絳為質高八尺東西當戶牖之間綉為斧文也亦曰斧依爾雅曰門屏之間謂之宇

兩手摠衣使去地尺

禮曲禮上兩手摠衣去齊尺

氣容肅也

禮玉藻君子之容舒遲見所尊者齊

音速

貌也速謂

威威也

足容重手容恭目容端口容止聲容靜頭容直

氣容肅

似不

立容德色容莊

執圭鞠躬如也章

諸侯命圭

周禮冬官考工記鎮圭尺有二寸天子守之命圭九寸謂之桓圭公守之命圭七寸謂之信圭侯守之命圭七寸謂之躬圭伯守之

命圭者王所命之圭也朝覲執馬居則守之子守穀

璧男守蒲璧不言之者闕耳

使大夫執以通信

禮郊特牲朝覲大夫之私覲非禮也大夫執圭而使

所以申信也

其君親來其臣不敢私見於主國君以君命聘則有私見不敢私覲

所以致敬也

執輕如不克

禮曲禮下凡執主器執輕如不克

舉前曳踵

禮玉藻執龜玉舉前曳踵蹢蹢如也

蹢謂足後跟也謂曳足跟行不

離地也

既聘而享用圭璧有庭實又曰發氣滿容

儀禮聘禮公受享幣擯者出請

擯謂主國之君所使出接賓客者也擯出

請賓不必賓事之有無

賓裼

裼者免上衣見裼衣

奉束帛加璧享擯者入

告出許

許受之

庭實

工庭中所陳設之物下文皮幣馬是也工庭門屏之內

皮則

攝之毛在內攝之入設也

皮虎豹之皮攝之者右手并執前足左手并執

後足毛在內不欲文之豫見也內攝之者兩手相向也入設亦參分庭一在南言則者或以馬也凡君於

臣臣於君麋鹿皮可也

記及享發氣焉盈容

發氣含氣也

衆介北

面蹠

七羊反

焉

衆介者士也蹠容貌舒揚也

君子不以紺緹飾章

詩所謂蒙彼絢絺是也

君子偕老嗟兮嗟兮其之展也蒙彼絢絺是袿袿也

玉不去身

禮曲禮下君無故玉不去身

觿礪之屬

禮內則子事父母雞初鳴咸盥漱櫛縱笄總拂髦冠

綏纓端鞞紳擗笏左右佩用左佩紛帨刀礪小觿金

燧

紛帨拭物之巾也刀礪小刀及厲礪也小觿解小
結也觿貌如錐以象骨為之金燧可取火於日

論語集註通證

四五

右佩玦捍管

音滯

大觶木燧

捍謂拾也言可以捍弦也管筆強也適刀鞞也

木燧鑽火也

偁

偁行滕

屨著綦

綦屨繫也

食不厭精章

聶而切之

禮少儀牛與羊魚之腥聶

直涉反

而切之為膾

聶之為言腩也

先藿葉切之復報切之則成膾

麋鹿為菹野豕為軒皆聶而不切

音軒

獻菹類也

五穀不成果實未熟之類

禮王制五穀不時果實未熟不粥於市

物未成不利人

木不

中伐不粥於市

伐之非時不中用周禮仲冬斬陽木仲夏斬陰木

禽獸魚鼈

不中殺不粥於市

殺之非時不中用月令季冬始漁周禮春獻鼈蜃

漢陸續之母切肉未嘗不方

後漢陸續傳

續字智初會稽吳人也

續詣洛陽詔獄

漢明帝時楚王英謀

反連及太守尹興及續時為尹興掾故坐就獄

續被掠考肌肉消爛終無異

辭續母遠至京師覘候消息獄事持急無緣與續相

聞

覘丑廉反

母但作饋食付門卒以進之續雖見考苦毒

而辭色慷慨未嘗易容唯對食悲泣不能自勝

得食知母

至悲泣不能自勝

使者怪而問其故續曰母來不得相見故

泣耳使者大怒以為獄門吏卒通傳意氣召將案之

使者欲召守獄門吏案問之

續曰因食餉羹識母自調和故知來

耳非人告也使問何以知母所作乎續曰母嘗截

肉未嘗不方斷葱以寸為度是以知之使者問諸謁

舍

謁舍所謂傳主人之舍也

續母果來於是陰嘉之上書說續行

狀帝即赦興等事還里禁錮終身續以老病卒

用醬各有所宜

禮內則濡豚包苦實蓼濡雞醢醬實蓼濡魚卵醬實

蓼濡鼈醢醬實蓼

凡濡為烹之以汁和也苦茗也用以包豚殺其氣卵讀為鯢鯢魚

子

暇

丁亂反脩蚺

直其反

醢

脩蚺也蚺蚺呼子也

脯羹兔醢

康膚魚醢魚膾芥醬麋腥醢醬

酒以為人合歡

禮樂記先王因為酒禮壹獻之禮賓主百拜終日飲

酒而不得醉焉此先王之所以備酒禍也

一獻士飲酒之禮百

拜以喻多故酒食者所以懽合也

肺為氣主

素問五藏生成篇諸脉者皆屬於目諸髓者皆屬於腦諸筋者皆屬於節諸血者皆屬於心諸氣者皆屬於

於肺

肺藏主氣故也

六十杖於鄉

禮王制五十杖於家六十杖於鄉七十杖於國八十杖於朝九十者天子欲有問焉則就其室以珍從

鄉飲酒之禮六十者坐五十者立侍以聽政役所以

明尊長也六十者三豆七十者四豆八十者五豆九

十者六豆所以明養老也

愚謂朱子獨引六十杖於鄉不曰七十八九十者

省文也言六十則七十以上者可知蓋六十杖於鄉而於鄉字切言於國於朝則於鄉不必言也杖於家者則未可杖於鄉故立侍以聽政役此見集註釋之精也

周禮方相氏掌之

夏官方相氏

方相猶言放想可畏怖之貌蒙熊皮黃金四目玄衣朱裳執戈揚盾可畏怖也

帥

與同

率百隸

隸同

而時難

音難帥領百隸之人而歲除難

以索室毆疫

以索室中疫鬼而驅遣之
月令季冬命國難索搜也

君賜食章

或餽餘故不以薦

禮曲禮上餽餘不祭父不祭子夫不祭妻

履齋孫氏曰所謂餽

餘者食物之餘雖妻子皆卑而父與夫亦不以食餘之物而祭之嫌其黷也然則非食物之餘焉有不祭乎者

周禮王曰一舉膳夫授祭品嘗食

天官膳夫掌王之食飲膳羞以養王及后世子

也食飯也飲

酒漿也膳牲肉也羞有滋
味者凡養之具大略有四
王曰一舉鼎十有二物皆

有俎

殺牲盛饌曰舉王一日舉以朝食也后與王同庖鼎十有二牢鼎九陪鼎三謂物牢鼎之實亦

九

以樂侑食膳夫授祭品嘗食王乃食

侑猶勸也祭謂刲肺脊也

禮飲食必祭示有所先品者每物皆嘗之道尊者也刲寸本反

卒食以樂徹于造

人惟萬物之靈而王者之所天也

前漢酈食

音其音基陳留高

曰王者以民為天而民

以食為天

天者人資而生者也王資民力而生不可忽也食得之則生弗得則死故民以食為

天

獻民數於王王拜受之

周禮秋官司民掌登萬民之數自生齒以上皆書於版辨其國中與其都鄙及其郊野異其男女歲登下其死生

登上也男八月女七月而生齒版今戶籍也下猶去也每歲更著生去死

及三年

大比以萬民之數詔司寇司寇及孟冬祀司民之曰獻其數于王王拜受之登于天府

若有疾風迅雷甚雨則必變雖夜必興衣服冠而坐

禮玉藻君子之居恒當戶

明鄉

寢恒東首

首生氣也

若有疾

風迅雷甚雨則必變雖夜必興衣服冠而坐

敬天之怒

顧不過轂

禮曲禮車上不廣欬不妄指立視五雋

立平視也雋猶規也謂輪

轉之度

式視馬尾顧不過轂

轂車轂也若轉頭不得過轂過轂則掩後人私也

色斯舉矣章

噢當作吳古閱反張兩翅也見爾雅

爾雅釋獸須屬獸曰鰲

許斯反獸之自奮迅動作名鰲

人曰橋

紀小反人

之罷倦頻伸天橋舒展屈折名橋


魚曰須

魚之鼓動兩頰若人之欠須導其氣息者名須

鳥

曰昊

鳥之張兩翅昊然搖動者名昊此皆
氣倦體罷所須若此故題云須屬也



論語集註通證卷上